



7. maj 2010

UKA 2010/61

Inatsisartut Suleriaasianni § 32 naapertorlugu aalajangiiffigisassatut siunnersuut imaattoq matu-muuna saqqummiupparput:

Angajoqqaat ukiumut 314.099kr.-it ataallugit isertitallit meeqqat atuarfianni 9 aamma 10. klassemi atuartuutillit aningaasanik pisortaniit ikiorserneqarsinnaanissamut qinnuteqarsinnaannngornissaat pillugu Naalakkersuisut siunnersuuteqaqqullugit peqquneqarnissaannik Inatsisartut aalajangiiffigisassaattut siunnersuut.

(Inatsisartunut ilaasortaq Malik Berthelsen, Siumut)

Tunngavilersuut:

Inatsisartut peqqussutaata nr.5, 28. oktober 1982-imeersup, tassa meeqqat atuarfianni atuartut angajullit atuartuunermusiaasa Inatsisartuni amerlanerussuteqartut, peqqusutip pisariaarunnera, tassa atuinnassallugu tunngavissaarunnera pissutigalugu, Naalakkersuisut allamik ilaqutariinnut eqqorneqartussanut taarsiissuteqaratik atorunnaarsippaat.

Uanga nammineq atuartuunermusiaqarlunga utoqqalinersialinni peroriartorsimallunga ilisimavara atuartuunermusiaqarneq inuuniarnermi tapertaalluurtuusooq. Taamaattumik pissakinnerit eqqarsaatigalugit assut Siumumiit uggorivarput peqqussutip atorunnaarsinnissaanut allamik ullutsinnut naleqqussakkamik Naalakkersuisunit taarteqartinneqangimmat.

Atuartuunermusiaqarnerup atorunnaarsinneqarnerani Ilinniartitsisut Kattuffiata, IMAK-ip tusarniaanermi akissutaani atuarneqarsinnaavoq, atorunnaarsitsiniarneq assut tupaallaatigalugulu eqqumiigigaa. Kiisalu piffissap ilaani meeqqat kaallutik innartartut tusagassiorfinni oqallisaaffiunerisa kingorna kiisalu ilaqutariit meerartallit atugaasa assigiinnginnerata suli annertuseriaqqinnissaa anilaangassutigalugu. IMAK tassaavoq meeqqat atuarfianni qanimut attuumassuteqarnerpaaq, taamaattumik ilinniartitsisut oqariartuutaat tusaassallugu pingaaruteqartoq isumaqarpunga. Tassami atorunnaarsitsineq aningaasaqarnikkut inissisimanerlunnerpaanut pinngitsoorani equivoq, toqqaanartumimmi "kaasarfianniit" ukiumut 7 mio.kr.-it peerneqarmata. Soorlumi Naalakkersuisut SIK-imut akissutiminni ima allattut, "peqqussutip atorunnaarnera atuisut ajornerusumik atugaqalernissaannik nassataqanngitsoorsinnaanngitsoq, tapiissuteqartoqartarunnaartussaammami".

Qulequtsiussanni malugeqqussavara angajoqqaat 314.099kr.-it angullugit isertitallit qinnuteqarsinnaassammata, tassa angajoqqaat misigisimasut "atuartuunermusianik" pisariaqartitsitsisorisut qinnuteqarsinnaassapput.

Una siunnersuut akuerineqassagalarpat, ukiumi atuarfiusumi 2008/2009-mi periuseq atorneqartoq, tassa angajoqqaat qanoq isertitaqartiginerat apeqqutaatillugu, aningaasat pissarsiarineqarsinnaasut qanoq annertussuseqarnissaannut agguasseriaaseq atorneqartoq . innersuutigerusuppara.

Tassa angajoqqaat qanoq isertitaqartiginerat apeqqutaatillugu aningaasat qinnutigineqarsinnaasut annertussusii assigiinngisitaassapput.

195.674 kr.-it angullugit isertitallit annertunerpaanik pisinnaassapput minnerpaanillu pisinnaassallutik 289.535 - 314.099 kr.-it akornanni isertitallit. Pisariaqartitsisut tamakkerlutik qinnuteqassagunik ukiumut 7 mio. kr.-inik naleqassaaq.

Aningaasat kommuninut ataatsimoortumik tapiissutiniit matussuserneqassapput. Atuartuunermu-siammi peerneqarneranni allaffissornikkut oqilisaataasut ima annertutiginningsorineqarput kommu-ninut ataatsimoortumik tapiissutinik Naalakkersuisut allannguissallutik pissutissaqarsorinatik.

Atuartuunermusiat peerneqarneranni Isumaginninnermut Naalakkersuisup oqaatigivaa, angajoqqaat pisariaqartitsisut atuarfik aqputiginagu inunnilli isumaginninnermik ikiorsiisarfik aqputigalugu ani-ngaasanik pisariaqartitsisut ikiorneqarsinnaasassasut.

Aningaasaqarnikkut inissisimanerlunnerpaat meerartaasa meeqqatut atuaqatimittuulli allatut arlaa-tigut atugarissaalaarnissaannik atugaasalu assiinnngissutaasa nikinganerannik annikillisaataasin-naammat neriuppunga siunnersuut Inatsisartunit taparserneqarumaartoq